



Islam donosi dobro muslimanima i štiti ih od zla (Medina)

Hatib: dr. Husejn ibn Abdulaziz Alu Šejh

26. džumadel-ula 1443. po Hidžri / 31. decembar 2021.

Hvala Allahu Koji je naredio razne vrste dobročinstva. Svjedočim da nema boga osim Allaha, jedinog, Koji druga nema, i svjedočim da je Muhammed Njegov rob i poslanik. Allahu moj, smiluj se, blagoslovi i spasi Muhammeda, sallallahu alejhi ve sellem, njegovu porodicu i njegove ashabe. O ljudi, bojte se Allaha, postići ćete uspjeh i najveću sreću. Poštovani vjernici, jedan od temelja na kojima počiva islam je preporuka da se čini sve što donosi korist i dobro na oba svijeta, i izbjegne, koliko je to moguće, sve što može uzrokovati onosvjetsku ili ovosvjetsku štetu, a na taj način postižu se sreća, spas, sigurnost i zaštita. Uzvišeni kaže: "Jedni drugima pomažite u dobročinstvu i čestitosti, a ne sudjelujte u grijehu i neprijateljstvu; i bojte se Allaha, jer Allah strašno kažnjava." (El-Maida, 2)

Pod ovaj princip može se podvesti briga o javnim i općim dobrima, kao što su putevi, dvorišta, parkovi i izletišta, koje izgradi vlast, radi opće koristi i koristi društva u cjelini. Islam podstiče svoje sljedbenike da vode brigu o javnim dobrima i spriječe svaki pokušaj njegovog uništavanja. Uzvišeni kaže: "... i dobra djela činite da biste postigli ono što želite." (El-Hadždž, 77) Poslanik, sallallahu alejhi ve sellem, rekao je: "Vidio sam čovjeka kako uživa u Džennetu zbog drveta koje je sklonio s puta jer je pričinjavalo neugodnost muslimanima." (Muslim) U drugom hadisu navodi se da je Poslanik, sallallahu alejhi ve sellem, rekao: "Dok je neki čovjek išao putem, naišao je na trnovitu granu, pa ju je sklonio, i Allah mu je zahvalio zbog toga i oprostio mu." (Muttefekun alejhi)

Allahu ekber, kolika je samo vrijednost ovakvih djela! O muslimani, otklanjanje neugodnosti sa javnih površina spada u dobročinstvo koje Uzvišeni Allah voli. "Allah, zaista, voli one koji dobra djela čine." (El-Bekara, 195) Postupanje u skladu





sa ovim principom svojstvo je istinskih vjernika. Poslanik, sallallahu alejhi ve sellem, rekao je: "Iman se sastoji od sedamdeset i nekoliko ili šezdeset i nekoliko dijelova. Najvredniji dio su riječi 'la ilahe illallah', a najmanji po vrijednosti je ukloniti s puta ono što smeta ljudima, a i stid je dio imana." (Muslim)

Otklanjanje svih vrsta neugodnosti s javnih površina, puteva i sl., predstavlja posebnu vrstu sadake koju čovjek čini prema sebi. Poslanik, sallallahu alejhi ve sellem, rekao je: "Da ukloniš neugodnost s puta, i to je sadaka." (Buhari) U Muslimovom Sahihu navodi se da je Poslanik, sallallahu alejhi ve sellem, rekao: "Predočena su mi djela moga ummeta, dobra i loša, pa sam među dobrim djelima vidio uklanjanje neugodnosti (prepreke) s puta."

O muslimani, navedeni šerijatski tekstovi sadrže preporuku (naredbu) o otklanjanju svake vrste neugodnosti i svega onoga što može naštetiti bilo kojem čovjeku. Stoga je vaša obaveza da udružite snage i uradite sve što je u vašoj moći kako biste unaprijedili i zaštitili javna dobra. Vjerovjesnik, sallallahu alejhi ve sellem, rekao je: "Ko ukloni neugodnost s puta koji koriste muslimani, Allah će mu upisati dobro djelo, a kome Allah, zbog toga, upiše dobro djelo, uvest će ga u Džennet." (Ahmed)

O vjernici, muslimanu je zabranjeno da čini bilo kakvu štetu i uzrokuje bilo koju vrstu neugodnosti protiv javnog dobra i interesa. Uzvišeni kaže: "A oni koji vjernike i vjernice vrijeđaju (uznemiravaju), a oni to ne zaslužuju, tovari na sebe klevetu i pravi grijeh." (El-Ahzab, 58) Vjerovjesnik, sallallahu alejhi ve sellem, u "prava puta" ubrojao je "ustezanje od bilo koje vrste uznemiravanja".

Jedno od šerijatskih pravila je da "nema štete niti nanošenja štete", a to je uzvišeno i časno vjerovjesničko pravilo koje sprečava muslimana da čini bilo kakvu štetu prema muslimanima ili njihovom javnom dobru, putevima, naseljenim i nenaseljenim područjima, i svemu što oni koriste.

Poštovani vjernici, obaveza je svakog muslimana da izbjegava sve ono što može naštetiti njemu i drugima prilikom upravljanja motornim vozilom, i da se ne poigrava





sa saobraćajnim propisima, koji imaju za cilj zaštitu života i imovine. Uzvišeni kaže:
“... i sami sebe u propast ne dovodite.” (El-Bekara, 195)

O vjernici, budite odmjereni i blagi u svim situacijama i izbjegavajte u vožnji sve što može dovesti do tragičnih posljedica, kao što je korištenje mobilnih uređaja, prekoračivanje dozvoljene brzine i sl. Koliko je samo teških saobraćajnih nesreća uzrokovalo nepoštivanje saobraćajnih pravila!

Poštovani vjernici, čuvajte se svega što vašu braću muslimane može dovesti u opasnost, svih vrsta neugodnosti, verbalnih i tjelesnih. Poslanik, sallallahu alejhi ve sellem, rekao je: “Ko bude prolazio kroz neku od naših džamija, a sa sobom bude imao strijelu, neka dobro uhvati njen vrh (oštricu) svojom šakom i neka ga čuva, kako ne bi ozlijedio nekog od muslimana.” (Muttefekun alejhi) Poslanik, sallallahu alejhi ve sellem, također je rekao: “Čuvajte se dvojice prokletih ljudi!” “A ko su oni, Allahov Poslaniče?”, upitaše ashabi. “To su oni koji obavljaju prirodnu potrebu na putevima i u hladovima u kojima ljudi odmaraju.” U vjerodostojnoj predaji navodi se da je Poslanik, sallallahu alejhi ve sellem, rekao: “Ko muslimanima bude pričinjavao neugodnost na putevima koje koriste, obavezno mu je njihovo prokletstvo.”

Jedno od najvrjednijih i najčišćih djela kod našeg Gospodara jeste donošenje što više salavata i selama na našeg prvaka, vjerovjesnika i miljenika Muhammeda, sallallahu alejhi ve sellem. Allahu moj, smiluj se, spasi i blagoslovi ga, i njegovu porodicu i sve njegove ashabe.

Donosite salavate na Poslanika, sallallahu alejhi ve sellem, podarenu milost i nepresušnu blagodat, to vam je naredba od vašeg Gospodara, Koji je objavio: “Allah i meleki Njegovi blagosiljaju Vjerovjesnika. O vjernici, blagosiljajte ga i vi i šalžite mu pozdrav!” (El-Ahzab, 56)

Allah podario blagoslov meni i vama u časnom Kur'anu, i okoristio mene i vas njegovim ajetima i mudrom opomenom. Rekoh ovo i od Allaha Uzvišenog tražim oprost za sebe, vas i sve muslimane od svakog grijeha, a tražite i vi, On mnogo prašta i milostiv je.

